



Khutba Jummah

HADHRAT MUHYI-UD-DIN AL-KHALIFATULLAH
Munir Ahmad Azim

12 Mai 2017
(15 Shabaan 1438 AH)

Après ki li fine salué tous so bane disciples (et tous bane musulmans) dans le monde entier avec la salutation de paix dans l'Islam, Hazrat Muhyi-ud-Din Al-Khalifatullah (atba) fine lire Tashahhud, Ta'uz, et Surah Al Fatiha, et li fine ensuite axé so Khutba Jummah lor « Pas sacrifier ou Deen pou saki Haraam »:

Allah Ta'ala fine donne tous dimounes de quoi ki li capave gagne céki li bizin pour satisfaire so bane besoins. Mais souvent problème là li surgir kan li envie satisfaire li avec ene l'étalage et extravagance ki so moyen pas permette ou bien li capave faire li avec le moyen ki li disposé mais par supprime quelque part dans so budget. Débalancement là commence à partir là même, parski bien souvent li alle faire li au détriment de bane kitchoses ki important et essentielle. Nous prend ene simple l'exemple pou comprend sa.

Ene dimoune li capave habille li dans ene façon convenable dans la simplicité avec ene linge ki coute meilleure marché. Mais li envie bane tissus de marque et de classe. Alors sa fine faire li dépense impé. Donc li fine bizin faire concession dans mangé et boire zis pour satisfaire so désir et so plaisir. Li fine bizin supprime bane kitchoses essentielle aussi. Kan nous faire sa avec ene zenfant ki bizin ene bon nourriture pour so développement, physique et mentale, alors sans conné nous pé commette ene crime envers nous propre zenfant. Combien ena parmi nous ki à cause zot l'habillement zot prend prêter. Et finalement zot gagne difficulté pour remboursé (nous appelle sa *Israaf*, c'est-à-dire, mal dépenser).

Donc, c'est bane zenfants ki paye les pots cassé parski kan ena problème finance dans la caze, bagarre entre missié et madame aussi vine ensam. Finalement zenfants ki paye tout. Voilà couma ena turbulence familiale et conjugale à cause bane extravagance dans dépense. Nous prive nous de céki bizin derrière céki pas bizin. C'est-à-dire, faire extravagance dans dépense sa li *Haraam* (illicite) sa.

Deen (La Religion, c'est-à-dire, L'Islam) enseigne nous la modération dans tous kitchoses. Sa li applique ziska dans *Ibaadat* (la prière) aussi. Nous bizin donne nous le temps dans *Ibaadat* mais faudré pas faire li ene quantité ki faire ou néglige lé zot responsabilité ou bien bane *Ibaadat* ki pli essentiel. Si sa li interdit dans *Ibaadat*, alors sa li donne ene l'idée de so gravité dans lé zot kitchoses. *Israaf* li faire ene dimoune tombe dans bane kitchoses indésirable et détestable pour gagne la monnaie. Li faire li perdi so dignité. Li adopté tous bane moyens pour gagne kass. Li coquin. Li embête dimounes. Li vine ene dimoune malhonnête. *Israaf* li applique plito dans bane kitchoses ki permette. Mais si pé faire dépense dans bane kitchoses ki pas permette, alors sa appelle sa *Tabzeer*. Et sa li pli grave ki *Israaf*. *Tabzeer* péna même so place. Li bien chagrinant ki nous dépense nous richesses ki nous fine gagner dans ene façon *Halaal* pour faire *Haraam*. Nous dépense nous létemps précieux, nous l'énergie et nous richesse dans bane activités *Haraam* pour néglige bane pratiques essentielles et obligatoire. Sa même ki appelle défaite lors défaite et *Haraam* lors *Haraam*.

Donc, nous la vie et non l'économie pé fini dans *Israaf* et *Tabzeer*. Ena ene lot kitchose ki appelle *Taqteer* ki veut dire serre la main kot bizin dépenser. Par exemple, ene dimoune li pas hésiter pour dépense dans bane zaffaires *Duniya* (pour sa le monde là). Mais arrive tour pour dépense dans le chemin d'Allah (par exemple paye so Zakaat, Chanda ou Al-Azim-Tafsir-ul-Quran Fund) li donne seulement Rs.100 ou Rs.200. Là aussi li trouve sa trop beaucoup, mais kan ena pour dépense dans bane cocktail, party ou alle diné en famille dans ene grand l'hotel ou même kan ena pour dépense dans mariage, sa kalité dimoune là faire bane dépenses exagéré, kot ene semaine l'amusement même avec plusieurs menu, et la veille mariage, jour mariage et le lendemain sa quantité dimounes invité pour déjeuner et diner et nous conné actuellement tous sa là coûte beaucoup l'argent. Et moi personnellement mo conne bane familles ki prend bane bel bel loan pour faire mariage zot zenfant et zot reste paye zot loan avec l'intérêt pendant 10 ans, et parfois arriver mariage là pas fine marcher bien, kot après quelques mois ou quelques l'années même mariage là cassé et parent là encore pé paye loan.

Bane mariage extravagant ou pou montrer lizié dimounes péna *Barakat* (bénédiction) ditout. Donc, quand il s'agit pou dépense pour *Deen* dans le chemin d'Allah zot trouve sa lourd et hésité pour dépenser dans le chemin d'Allah. Kan ou pas dépense dans le chemin d'Allah, péna *Barakat*, ou l'argent aller dans bane dépense inutile et extravagance. Donc,

c'est une grande manquement dans nous. Tous sa là à cause ki nous faire extravagance dans dépenser ou sois nous manque confiance dans nous *Rab*. Céci nous pour dépenser dans le chemin d'Allah, Allah (swt) pour multiplier sa 10 fois pliss ki nous fine dépenser et pour ena *Barakat* dans nous l'argent et dans nous la caze.

Donc, nous dépenser pliss ki bizin dépenser kot gagne droit dépenser ou bien nous pas hésiter dépense kot bizin pas dépenser. So conséquence inévitable, c'est ki nous pou bizin supprime kot bizin dépenser ou bien nous pas pou ena même pou capave dépenser.

Ene dimoune li soif. Li bizin quelque chose pour boire pour passe so la soif. Li capave faire li par boire ene verre de l'eau ki peut être pas coûte li nannié. Couma li capave faire li avec ene la boisson couma ene jus de fruit ou bien ene la boisson gazeuse ki normalement bizin acheter. Mais sa dimoune là li pas envie contente li avec de l'eau. A sa stade là, nous ena deux kitchoses: Besoin là capave satisfaire li sans dépensé mais pour l'envie là bizin mette la main dans poche. A partir de là nous capave comprend ki souvent le besoin li facile à satisfaire. C'est nek l'envie ki dimane zeffore et la peine.

Donc, ene dimoune li capave vive bien si li supprime so bane l'envie ou bien limite li à céki so moyen permette li avec facilité. Mais problème vini kan li galoupe derrière so l'envie. Pour sa li bizin faire dépense additionnelle ki nécessite zeffore supplémentaire. Li bizin lé temps aussi pour réalise sa. Et si li pas capave faire li dans ene façon juste et convenable alors li pou ena tendance adopté bane moyens indigne et condamnable. Li pas pou hésiter cause menti, embête dimoune ou rentre dans bane transactions ki pas permette dans *Deen*. Li déza bien grave si li pé faire tout sa là pour satisfaire so bane l'envie ki permette. Mais si bane l'envie là zot condamnable, illégale et détestable, alors problème là li vine encore pli pire.

Ene musulman bizin toujours contente li par saki li ena et li ena droit pou satisfaire so bane besoins. Li ena droit aussi satisfaire so bane l'envie si so moyen permette li, mais jamais au détriment de so *Deen*. A cause sa même *Shariah* mette bocou l'emphase lors être satisfait lors céki ou ena. Dans ene hadith rapporté dans Sounan At-Tirmidhi, Rassoollullah (saw) fine dire: "*N'importe ki kikaine parmi ou ki zoine le matin dans ene l'état ki li senti li sain et sauf à l'intérieur de li, li en bonne santé et li ena so nourriture pour sa jour-là, alors couma dire Duniya même fine vine kot li.*"

C'est-à-dire, ene dimoune ki senti li bien physiquement et moralement et ki ena so nécessité, alors li fini gagne tout céki ene dimoune bizin dépi dans sa grand le monde là. Ene *duah* ki recommandé pour demander tout les temps afin ki ene dimoune satisfait avec sa tigitte ki li ena et avec sa *duah* là même ki mo pour termine mo Khutba azordi ici même. **O Allah! Faire moi satisfait avec céki To fine accorde moi.** *Ameen, Summa Ameen.*